




ILIDŽA

INFORMATIVNI BILTEN OPĆINE ILIDŽA
Ilidža • Maj 2017 • Broj 160





Ambasador Saudijske Arabije u BiH Hani bin Abdullah Momina posjetio Općinu Ilidža

Njegova ekscelencija Hani bin Abdullah Momina, ambasador Saudijske Arabije u BiH posjetio je 19. maja 2017. godine Općinu Ilidža. Načelnik Općine Ilidža prof. dr. Senaid Memić upoznao ga je sa trenutnom ekonomskom situacijom u općini, privrednim i turističkim potencijalom, kao i budućim razvojnim projektima. Posjeta je protekla u konstruktivnim diskusijama vezano za mogućnosti unapređenja saradnje i u narednom periodu.

Nakon prezentovanih projekata ambasador Hani bin Abdullah Momina istakao je zadovoljstvo postignutim napretkom Općine Ilidža.

“Prioriteti moje misije su pokretanje politike Kraljevine Saudijske Arabije radi nastavka saradnje i podrške Bosni i Hercegovini, politički i ekonomski. Kraljevina Saudijska Arabija će nastaviti sa svojom politikom podrške jedinstvu i stabilnosti Bosne i Hercegovine, jer je suživot različitih religija i nacija na



njenom prostoru jedinstven primjer i dokaz tolerantnosti bosanskohercegovačkog društva i prihvatanja drugog. Prijatno sam iznenađen napretkom kojim ide Ilidža i nadam se da ćemo nastaviti dobru saradnju. Na Ilidži su ljudi dobronamjerni i dobri domaćini svima “ istakao je ambasador Hani bin Abdullah Momina.

Na Ilidži susreti biznismena

Sarajevo Business Forum 2017 (SBF), osma međunarodna investicijska konferencija 23. maja 2017. godine svoj rad, drugog dana održala je u Hotelu Hills na Ilidži. Načelnik Općine Ilidža prof. dr. Senaid Memić prisustvovao je ovom događaju, a razgovarao je sa mnogim investitorima, kojima je prezentirao razvojne potencijale općine.

Na Forumu je planirano niz sesija, a međunarodni i domaći zvaničnici, investitori i stručnjaci su razmotrili teme povezivanja širih regiona istočne Azije i jugoistočne Evrope te centralne i zapadne Azije s našom regijom.

Na ovogodišnjem SBF-u predstavljeno je niz projekata iz poljoprivrede, energetike, obrazovanja, finansija, infrastrukture, građevinarstva, usluga, turizma i drugih razvojnih sektora.

Sarajevo Business Forum organizuje BBI banka u saradnji s Islamic Development Bank

Group (IDB). Prvi dan, 22. maj 2017. godine, Sarajevo Business Forum protekao je u znaku razgovora o regionu, i povezivanju Istoka i Zapada.





Potpisani ugovori za dodjelu 70 plastenika

Općina Ilidža kontinuirano podržava razvoj primarne poljoprivredne proizvodnje. Na osnovu Pravilnika o utvrđivanju uslova, kriterija i postupaka za ostvarivanje prava na dodjelu, a u okviru realizacije projekta „Dodjela plastenika na općini Ilidža“ i ove godine je organizovana dodjela plastenika. Na prijedlog komisije, općinski načelnik je donio odluku o dodjeli plastenika za 70 osoba, površine 100 kvadratnih metara sa kompletnom opremom, čija pojedinačna vrijednost iznosi oko 3000 KM. Za realizaciju ovog projekta Općina Ilidža je iz budžeta izdvojila 192.000 KM. U sali Općine Ilidža 4. maja 2017. godine, sa kandidatima koji su ostvarili pravo na dodjelu potpisani su ugovori o dodjeli i isporuci plastenika.

„Općina Ilidža je od 2010. godine do sad podijelila ukupno 518 plastenika čija ukupna vrijednost iznosi oko 1,5 miliona KM. Ovo je najbolji način pomoći građanima, da im omogućimo da sami svojim radom proizvedu hranu za svoje potrebe i na taj način ostvare dodatni prihod, što je korisnije nego drugi vid pomoći. Ovo je dobra namjera da se pomogne ljudima koji hoće raditi, da im se da alat u ruke. Neka vam je sa srećom“, kazao je načelnik Općine Ilidža prof. dr. Senaid Memić u svom obraćanju dobitnicima plastenika.



Uskoro kino projekcije i na Ilidži

Općina Ilidža kupila je kino projektor u vrijednosti 124.875, 47 KM, koji će biti instaliran u objektu bivšeg kina Igman, ulica Hrasnička cesta 8. Sporazum o regulisanju međusobnih prava i obaveza u vezi s korištenjem sistema kino projekcije potpisan je 23. maja 2017. godine u Općini Ilidža. Sporazum su potpisali načelnik Općine Ilidža prof. dr. Senaid Memić i direktor Javne ustanove Kulturno-sportski i rekreacioni centar Ilidža Sead Kulović.

“Nadam se da će nekadašnje kino postati ponovo mjesto susreta ljubitelja filma. Posjetioći će uživati u projekcijama najnovijih filmskih ostvarenja, a posebnu pažnju trebalo bi posvetiti dječijim filmovima. Nadam se da će ova pozitivna novina na Ilidži dobiti simpatije Ilidžanaca koji će dolaziti i uživati. Prostor kina koristit će se i dalje za organizaciju kulturno - zabavnih i umjetničkih sadržaja” rekao je načelnik Općine Ilidža prof. dr. Senaid Memić.

“Zahvaljujemo se Općini i načelniku koji su imali razumijevanja i obezbijedili novčana sredstva za ovu opremu. JU KSIRC organizirat će komercijalne projekcije po cjenovniku koji će donijeti Upravni odbor JU KSIRC, uz saglasnost načelnika, istovremeno poštivajući sve zakone kojim se reguliše ova oblast” izjavio je direktor Kulović.

Zajedno do trajnog rješenja problema pasa lualica

Općinu Ilidža posjetili su 21. maja 2017. godine ministri u Vladi Kantona Sarajevo, Senad Hasanspahić, ministar komunalne privrede i infrastrukture i Amela Dautbegović, ministrica za rad, socijalnu politiku, raseljena lica i izbjeglice.

Izgradnja Centra za udomljavanje pasa bila je glavna tema razgovora sa njihovim domaćinom, načelnikom Općine, prof. dr. Senaidom Memićem.

Prema riječima ministrice Dautbegović engleski investitori u saradnji sa Fondacijom Dog Trust ozbiljno su zainteresirani za izgradnju centra za udomljavanje pasa. Ulaganja bi bila veća od 80 miliona maraka i tu bi se stvorila mogućnost za nova radna mjesta. Centar bi trebao biti prijatno mjesto za posjete kao i prilika za volontiranje mladih, te rehabilitaciju ranjivih grupa (ratni veterani s PTSP-om, ovisnici, djeca sa posebnim potrebama i drugi).

Načelnik Općine Ilidža prof. dr. Senaid Memić zainteresiran je za sistemsko i trajno rješavanje problema pasa lualica, kao i za pronalaženje adekvatne parcele za te namjere.

Razgovarano je i o rješavanju problema u zgradama socijanog stanovanja u Otesu i izmjeni RP Vlakovo i mogućnostima proširenja područje za gooblje.





Pripreme za Festival

Pripreme za održavanje Festivala narodne muzike "Ilidža 2017" koji će se održati od 26. do 29. jula 2017. već su ozbiljno počele. U Općini Ilidža 15. maja 2017. godine održan je sastanak Organizacionog odbora kako bi se dogovorili svi detalji i kako bi publika dobila što kvalitetniji ugođaj i za uši i oči.

Na ovogodišnji konkurs za pjesmu "Ilidža 2017" prijavila su se 52 autora. Komisija za selekciju kompozicija na prvo slušanje izabrala je 32 pjesme. Ponovnim preslušavanjem komisija je navedene pjesme bodovala i zbirom bodova prošlo je 20 pjesama koje će se takmičiti na festivalu "Ilidža 2017." Autori su na ovogodišnjem konkursu ponudili i nove melodije, tekstove i aranžmane koji zadovoljavaju kriterij za izbor pjesama za Festival narodne muzike "Ilidža 2017". Žiri je posebnu pažnju usmjerio na očuvanje muzičkog oblika narodne pjesme BiH. Osnovni cilj izabranih pjesama je tendencija da se ljubav prema tradiciji našoj narodnoj muzici i dalje nastavi njegovati u što kvalitetnijem obliku, rečeno je na sastanku Organizacionog odbora.

Pobjednička pjesma dobit će 5.000 KM, najbolji tekst 2.000 KM, najbolja muzika 2.000 KM, najbolji aranžman 2.000 i najbolji izvođač 2.000 KM.

Općina Ilidža i dalje lider u Kantonu po broju ostvarenih noćenja turista

Prema podacima Zavoda za informatiku i statistiku Kantona Sarajevo za 2016. godinu, kao i predhodnih godina, Općina Ilidža je lider u Kantonu Sarajevo po broju dolazaka i ostvarenih noćenja turista, a u samom vrhu je na nivou Bosne i Hercegovine.

Broj registriranih dolazaka na Ilidžu u 2016. godini je 150.165 gostiju, koji su ostvarili 285.675 noćenja u istom periodu.

Smještajni kapaciteti na Ilidži čine 33 posto ukupne ponude Kantona Sarajevo i 10 posto Bosne i Hercegovine.

Povećanju smještajnog kapaciteta, kao i povećanju ukupne turističke ponude doprinjela su velika ulaganja privatnog sektora u izgradnju novih hotela, te dogradnju i rekonstrukciju postojećih ugostiteljsko-turističkih sadržaja. Izgrađeni su novi hoteli: Hills; Malak Regency; Krone; New Hotel; Dubai i hotelsko naselje "Oaza". Ova ulaganja su imala pozitivan uticaj na povećanje stope zaposlenosti. Na području općine Ilidža ima 27 smještajnih objekata (23 hotela, po jedno hotelsko naselje-auto kamp, motel, hostel i ženski studentski dom) sa ukupno 1.736 smještajnih jedinica/soba i 3904 kreveta/ležaja.

Pored respektabilnog kapaciteta hoteli su opremljeni i drugim sadržajima: kongresnim dvoranama, restoranskim mjestima, ljetnim baštama, svečanim salonima, otvorenim i zatvorenim bazenima, sportskim salama i drugim pratećim sadržajima, čime je obogaćena turistička supstruktura i proširen spektar ponuda turističkog proizvoda.

Pored navedenog, neizostavno treba napomenuti da turističkoj ponudi doprinose lokaliteti Vrelo Bosne i Spomeničkog kompleksa „Tunel D-B“ koji su u žiži interesovanja kako stranih, tako i domaćih turista.

A u takmičarskoj noći narodne muzike svoje bodove će davati stručni žiri u sastavu: Enes Begović, Hanka Paldum, Ana Babić, Ognjen Bomoštar, Ibrahim Mangafić, Fahrudin Pecikoza, Tomislav Kašljević, Radoslav Grajić i direkcija festivala. U sklopu revijalne večeri bit će dodijeljena i nagrada Nedžadu Salkoviću za očuvanje narodne pjesme.

Podsjećamo Festival će trajati četiri večeri. U revijalnoj noći publiku će zabavljati Enes Begović, Hanka Paldum, Lepa Lukić, Semir Cerić Koke, Ibrica Jusić, Hasiba Agić...



Priznanje Matičnom uredu Općine Ilidža

Matičnom uredu Općine Ilidža dodijeljena je zahvalnica Federalnog ministarstva unutrašnjih poslova za korektnu i veoma uspješnu saradnju u procesu implementacije Zakona o matičnim knjigama FBiH, postignute rezultate i doprinos razvoju matične djelatnosti.

Priznanje je uručeno pomoćnici općinskog načelnika za opću upravu Mirsadi Hasečić na svečanosti povodom 12. maja, Dana matične službe FBiH.

Općina Ilidža je uložila značajna finansijska sredstva za unaprijeđenje rada općinske administracije, a Matični ured Općine uvezan je u Jedinostveni matični registar FBiH.

Obezbjedeći su propisani tehnički uvjeti u prostorijama u kojima su matične knjige, kako bi se povećala njihova sigurnost, a urađen je i video nadzor kao dodatni način osiguranja.

Obzirom da se upisi u matične knjige rođenih vrše po prebivalištu majke djeteta, a upis u matičnu knjigu umrlih po posljednjem prebivalištu umrle osobe, dodatno je povećan obim posla matičnog ureda. Budući da su izvodi trajnog karaktera samim tim je povećana i potreba za njihovim kopiranjem i ovjeravanjem. U namjeri da se građanima skрати vrijeme čekanja, a zaposlenicima olakša posao uveden je i sistem elektronske ovjere dokumenata.





Za izgradnju mosta izdvojeno 463.846,04 KM

Izgradnja mosta preko rijeke Tilave u sklopu saobraćajnice od ulice dr. Mustafe Pintola do Mosta Alije Izetbegovića je završena.

Most je pločasti, dužine 40 metara širine 11,54 metra. Na mostu se nalaze dvije kolovozne trake širine po tri metra i dvije pješačke staze, širine tri i 2.10 metara. Vrijednost radova je 463.846,04 KM. Radove je izvodila firma Džekos d.o.o. Investitor je Općina Ilidža.



Postavljena saobraćajna ogledala na 24 lokacije

Općina Ilidža je u aprilu 2017. godine izvršila postavljanje saobraćajne opreme-ogledala na 24 lokacije. Navedena ogledala postavljena su u cilju obezbijedenja preglednosti na raskrsnicama.

Izvođač radova bila je firma Savico d.o.o. Vrijednost radova: 6.966,60 KM, a investitor je Općina Ilidža.

Zamijenjena stolarija u Katoličkom školskom centru “Sveti Josip” na Stupu

Radovi zamjene stolarije i obnove školskog toaleta u Katoličkom školskom centru “Sveti Josip” Podružnica Stup su završeni. Općina Ilidža je za te namjene izdvojila 75.000 KM. Tim povodom, načelnik Općine Ilidža prof. dr. Senaid Memić 4. maja 2017. godine posjetio je ovu obrazovnu instituciju. Njegovi domaćini bili su ravnatelj Katoličkog školskog centra Mario Ćosić i mons. dr. Pero Sudar, pomoćni biskup vrhbosanski, koji su izrazili zahvalnost Općini Ilidža i njenom načelniku na donaciji kojom su se poboljšali uslovi rada za učenike.

“Sredstva koja je Općina Ilidža dala utrošili smo za zamjenu dotrajale stolarije i toaleta za nastavnike i sada naši učenici su se puno bolje ugrijali. Ovo je škola koja ima 23 odjeljenja i 510 učenika i vaša donacija nam puno znači i učenicima i nastavnicima” rekao je Ćosić, te naglasio da vlada veliko interesovanje za upis u prvi razred ove škole. Prema njegovim riječima već 91 učenik je upisan. “Koristim ovu priliku da Vam se zahvalim na finansijskoj pomoći za adaptaciju škole. Ovo je škola u kojoj vlada red i rad. Bosna je uvijek imala dobre ljude i ljudi su uvijek ovdje jedni drugima pomagali. Dobrota naših ljudi je spontana, jer biti dobar bh. je opredjeljenje životno, a

suživot različitih naroda koji se njegovao je naše bogatstvo,“ rekao je biskup Pero Sudar.

Načelnik Memić zahvalio je na časti koja mu je ukazana prilikom posjete, naglasivši da je dodjela sredstava iako nije nadležnost općine, bila njegova obaveza.

“Sva djeca su naša, a stvaranje svima jednakih uslova za učenje je prioritet i vodilja. Ova djeca će vratiti uložena sredstva svojim znanjem i pozitivnim odnosom prema školi, drugarima i društvenoj zajednici” dodao je načelnik Memić.





Poljoprivrednici s Ilidže na sajmu "Dani trešnje 2017"

Članovi Udruženja poljoprivrednika Kantona Sarajevo sa područja općine Ilidža, učestvovali su na 15. Međunarodnom jubilarnom Sajmu privrede, poljoprivrede, prehrane i turizma "Dani trešnje 2017", koji se održavao od 23-25. maja 2017. godine u Gradu Mostaru.

Općina Ilidža je finansijski podržala ovaj Sajam u iznosu od 2.500,00 KM, a 35 poljoprivrednika, u organizaciji općine je posjetilo Sajam na dan otvorenja.



Podijeljeno 50 paketa bivšim logorašima

Udruženje logoraša Općine Ilidža u povodu mjeseca Ramazana upriličilo je podjelu prehrambenih paketa 25. maja 2017. godine svojim članovima. Ovom prilikom podijeljeno je 50 paketa. Donator paketa je Savez muslimanske omladine NEDWE.

Enes Đelilović predsjednik Udruženja logoraša Općine Ilidža zahvalio je donatorima izrazivši nadu da će se dobra saradnja i ubuduće nastaviti.

"Svake godine mi dobijamo značajan broj paketa za naše članove od NEDWE.

Ovo je prva podjela u ovoj godini, a nadamo se da ćemo osigurati još najmanje 100 paketa tokom 2017." izjavio je Đelilović. U organizaciji ovog udruženja završeno je pisanje knjige "Sjećanje na ožiljke iz devedesetih" autora Enesa Đelilovića. Knjiga govori o sjećanjima i preživjeloj golgoti u logorima, a rezultat je prkosa i ustrajne borbe samog autora.

On se nada da će knjiga izazvati velike reakcije jer se spominju zločini i zločinci koji nisu nikad procesuirani. To je lična ispovjest o stradanju i borbi za život i opstanak. Oživljene su kroz knjigu slike iz prošlosti koje su duboko urezana u sjećanje autora. Autor ispovjeda svoja sjećanja i "žive rane" na koju, kako reče, neće ni jedan čitalac ostati ravnodušan. Promocija knjige bit se sredinom juna.



"Unaprijeđenje općekorisnih funkcija šuma i okoliša kroz segment pošumljavanja"

U Domu kulture u Hrasnici, u organizaciji Ekološkog udruženja "Aleja", održano je predavanje o temi "Unaprijeđenje općekorisnih funkcija šuma i okoliša kroz segment pošumljavanja". Predavanje je održao Haris Krupalija diplomirani inženjer šumarstva, profesor u Srednjoj školi za okoliš i drveni dizajn u Sarajevu.



Obilježena godišnjica Podružnice 10 Četvrte viteške motorizovane brigade

U povodu obilježavanja godišnjice Podružnice 10 Četvrte viteške motorizovane brigade Butmir u organizaciji Udruženja Četvrta viteška motorizovana brigada Ilidža održano je niz zanimljivih sadržaja. Turnir u šahu za veterane održan je 20. maja 2017. godine u Osmoj osnovnoj školi "Amer Čenanović" a pobjednik je Džeko Škrijelj, Kemal Bajramović je bio drugi, a treće mjesto zauzeo je Ale Suljević.

Turnir u fudbalu održan je 24. maja 2017. godine. Ekipa Podružnice 10 Četvrte viteške brigade Butmir su pobjednici, ekipa Grasa bila je druga, a treće mjesto zauzela je ekipa Vojne policije Trećeg motorizovanog bataljona.

Podjela zahvalnica i pehara za pobjednike i učesnike bit će održana na svečanoj akademiji 13. juna 2017. godine u 18 sati u Domu kulture - Butmir. Predsjednik Podružnice 10, Izet Hurić izrazio je zahvalnost svim učesnicima koji ne daju da se značaj Podružnice 10 zaboravi, a posebnu zahvalnost uputio je direktoru Osme osnovne škole "Amer Čenanović" Vahidu Čustoviću.

U sklopu godišnjice također održan je historijski čas sa učenicima Osme osnovne škole "Amer Čenanović" na kojem je ukazano na značaj ove brigade u agresiji na Bosnu i Hercegovinu. Čas je održao komandant Mehmedalija Arnaut.





Obilježena godišnjica stradanja građana Kasindolske ulice i Dan MZ Stup II

Prije 25 godina, 14. maja 1992. godine, 38 muškaraca, civila, odvedeno je iz Kasindolske ulice na Ilidži u KPD Kula. U maju 2007. godine posmrtni ostaci njih 37 pronađeni su u masovnoj grobnici na području Romanije. Najmlađa žrtva bio je 18-godišnji Emir Hajdarević, koji je odveden i ubijen zajedno sa svojim ocem. U organizaciji Udruženja "Žene Kasindolske 92" i Općine Ilidža nastavlja se borba za istinu.

Položeno je cvijeće i poručena Fatiha na mjestu zarobljavanja stanovnika Kasindolske ulice i na centralno spomen obilježje na Stupu 16. maja 2017. godine.

U prisustvu rodbine, prijatelja, predstavnika Općine Ilidža u prostorijama mjesne zajednice Stup II okupili su se građani ove MZ i još jednom se prisjetili hrabrosti i požrtvovanja branitelja ovih strateški važnih prostora, sa željom da trajno sačuvaju sjećanje na šehide i pale borce ovog područja.

Nisveta Zametica predsjednica Udruženja "Žene Kasindolske 1992." podsjetila je da i nakon 25 godina za zločine niko nije odgovarao.

"Ogorčeni smo jer još uvijek niko nije odgovarao za ovaj zločin. Znamo odgovorne, a to su Momčilo Mandić, tadašnji ministar pravde RS i Tomo Kovač, načelnik Stanice bezbjednosti Ilidža" rekla je Zametica.



Obilježeno 25. godina Prve samostalne brigade

Udruženje boraca Prva samostalna brigada, polaganjem cvijeća i odavanjem počasti šehidima i poginulim borcima obilježilo je 25. godišnjicu formiranja brigade.

U prisustvu saboraca, članova porodica boraca i gostiju, centralana svečanost u povodu obilježavanja 25. godišnjice formiranja Prve samostalne brigade Sarajevo održana je 13. maja 2017. godine ispred prostorija Mjesne zajednice Stup II, koju su zajedno organizovali udruženja Prva samostalna brigada Sarajevo i Prva samostalna brigada Stup-Ilidža.

Prva samostalna brigada zvanično je formirana 19. maja 1992. godine od veće postojećih jedinica sa područja ilidžanskih mjesnih zajednica Otes, Stup, Stup II i Stupsko brdo koje su joj bile zona odgovornosti. Brigada je bila nosilac odbrane ovih prostora i sudjelovala je u svim defanzivnim i ofanzivnim borbenim aktivnostima na ovom važnom pravcu odbrane grada Sarajeva i države Bosne i Hercegovine.



Nisu zaboravljeni Anes Bučan, Jagoda Galešić, Ismet Osmanović, Ramo Husref i Sead Hodžić

Čuvajući sjećanje i njegujući historiju odbrane protiv agresije na BiH i ove godine na dostojanstven način je obilježen Memorijalno -historijski susret "Odbrana Ilidže 2."

U organizaciji JOB-a Općine Ilidža-Unija veterana, Četvrte viteške brigade i Općine Ilidža 15. maja 2017. godine, delegacije porodica, boračkih udruženja i Općine Ilidža i Općinskog vijeća Ilidža položile su cvijeće, proučile Fatihu i odale počast poginulima na spomen-obilježja kod Ljetne pozornice.

"Tog 14. maja 1992. na ovom mjestu vodila se najznačajnija bitka za odbranu ilidžanskih teritorija. Tog četvrtka 14. maja, slabo naoružani borci krenuli su u bitku sa višestruko jačim neprijateljem. Organizirani u jedinice Teritorijalne odbrane i redovne i specijalne jedinice MUP-a izvršili su prodore prema centru Ilidže iz više pravaca. U borbama su naše snage imale početne uspjehe, ali zbog mraka i slabe vojne komunikacije, uvezanosti, zbog izostanka vojne pomoći i municije, zaustavili su svoje napada i vratili se na početne položaje. Osim bitke, taj 14. maj ostao je upamćen i kao događaj kada su snage UNPROFOR-a mirno ćutale i posmatrale, a to nisu smjele. Tada su pripadnici UNPROFOR-a svojim transporterom, 15. maja, povezle teško ranjene Anesa Bučana, Jagodu Galešić, Ismeta Osmanovića, Ramu Husrefa i Seada Hodžića, preko ilidžanske teritorije u bolnicu Koševo. Uprkos sporazumu o primirju između Armije BiH i Vojske RS iz transportera su izvučeni i pogubljeni" prisjeća se Šefket Đešević, predsjednik JOB-a Općine Ilidža. Sekretar JOB-a Izet Kahvić rekao je da se ove manifestacije organizuju, prije svega zbog učenika i historijskog časa koji se održava, da bi učenici čuli šta se dešavalo jer u knjigama ne mogu naučiti.

"Prava istina još nije utvrđena niti je do sada za ovaj zločin iko odgovarao. Ovaj datum se treba obilježavati na dostojanstven način, a javnost upoznati sa pravom istinom" dodaje Kahvić.

Svoju ljubav i patriotizam prema domovini iskazali su i učenici Prve osnovne škole u pisanju literarnih radova o temi "Tako se branila Bosna".

Nagrađena se i tri najbolja rada. Treće mjesto je Amina Bostandžić, drugo Nermin Bijelonja, a prvo Zakir Kešmer.



Obilježena godišnjica bitaka za Stojčevac

U organizaciji Udruženja Drugi motorizovani bataljon Četvrtе viteške motorizovane brigade i Općine Ilidža u prisustvu boraca, članova porodica šehida i poginulih boraca, predstavnika Općine, učenika i brojnih građana, 15. maja 2017. godine, održan je Memorijalno-historijski susret „Dani bitaka za Stojčevac“. Na spomen-obilježje Stojčevac, poginulim borcima Harisu Opankoviću, Nedžaduh Granulu-Gigiju položeno je cvijeće, proučena Fatiha i odata počast i dužno poštovanje svim šehidima i poginulim borcima. Tog 15. maja 1992. godine nakon povlačenja snaga UN-a, agresor je krenuo u osvajanje Stojčevca strateški najvažnijeg mjesta za odbranu Ilidže, Sarajeva, a i Bosne i Hercegovine. U tome su ih, nakon teških i krvavih borbi, spriječili borci 104. motorizovane brigade Armije RBiH i sačuvali ovaj strateški značajan prostor. Od tog dana svakodnevno su se vodile žestoke borbe sa agresorom za očuvanje ovih teritorija, pa je ovaj datum simbol svih tih bitaka, dan sjećanja na sve šehide i poginule borce koji su dali svoje živote za slobodu i odbranu ove teritorije i cijele Bosne i Hercegovine. Ovaj značajan datum je ujedno i godišnjica formiranja Drugog motorizovanog bataljona Četvrtе viteške motorizovane brigade i Dan mjesne zajednice Hrasnica II, koji su tradicionalno obilježeni nizom kulturno-sportskih manifestacija. Tim povodom održan je svečana akademija u Domu kulture Hrasnica i memorijalni turnir u malom nogometu „Haris i Gigi“ na kome su učestvovali učenici osnovnih škola iz Hrasnice, Sokolović -Kolonije i Butmira. Prigodan program pripremili su učenici i nastavnici Druge i Četvrtе osnovne škole.



Obilježen Dan logoraša općine Ilidža

Polaganjem cvijeća ispred spomen-ploče na Srednjoj tehničkoj školi, grafičkih tehnologija, dizajna i multimedije, 12. maja 2017. godine, obilježen je Dan logoraša općine Ilidža pod nazivom „Da se ne zaboravi i ne ponovi“. Cvijeće su položili delegacije Udruženja logoraša općina Ilidža, Stari Grad, Hadžići i Novi Grad, Udruženja antifašista boraca NOR-a Ilidža i Koordinacije boračkih udruženja Ilidže. Mnogobrojnim prisutnim obratio se predsjednik Udruženja logoraša Općine Ilidža Enes Dželilović istakavši da je na području općine tokom agresije bilo osam logora u kojima su nevini ljudi zvjerski mučeni i ubijani, a počinioci zlodjela nisu otkriveni i procesuirani, te poručio predstavnicima vlasti da je potrebna veća moralna i materijalna potpora ovoj kategoriji društva koja još uvijek nema svoj zakonski okvir, kojim bi riješila svoja statusna prava.

Skupština udruženja logoraša Ilidža, za izuzetnu saradnju i doprinos u radu ovog udruženja dodijelila je plaketu „Počasni član“ Ameli Dautbegović, ministrici Ministarstva za rad, socijalnu politiku, raseljena lica i izbjeglice Kantona Sarajevo, prof. dr. Senaidu Memiću, načelniku Općine Ilidža i Ibri Husiću predsjedniku humanitarne organizacije NEDWE.

Prigodan program izveli su učenici ilidžanske Prve osnovne škole.

Obilježen Dan pobjede nad fašizmom

Drugi svjetski rat u Evropi, u kojem je živote izgubilo više od 50 miliona ljudi, završen je prije 72 godine. Taj dan, 9. maj obilježava se kao Međunarodni dan pobjede nad fašizmom. Tim povodom zajednička delegacija Općine Ilidža i Udruženja antifašista i boraca narodnooslobodilačkog rata Ilidža i delegacija Koordinacije boračkih udruženja Ilidža položili su cvijeće na spomen-kosturnicu u Velikom parku na Ilidži i odali počast svim poginulim u Drugom svjetskom ratu i proteklom odbrambeno-oslobodilačkom ratu u Bosni i Hercegovini.

Svečanosti su pored članova UABNOR-a prisustvovali i predstavnici Općine Ilidža, boračkih udruženja, političkih partija, izviđača, učenika i brojni građani.






Prihod od školskog bazara za opremanje produženog boravka

Peta osnovna škola organizovala je tradicionalni Školski bazar koji je održan 22. maja 2017. godine u dvorištu ispred škole, a u čijoj realizaciji su učestvovali učenici, roditelji, Vijeće roditelja, uposlenici i menadžment škole. Učenici su zajedno sa nastavnicima izložili svoje kreacije koje su radili na sekcijama tokom godine, a roditelji svoje prehrambene proizvode. Bazar je bio prodajnog karaktera. Prihod od prodaje izloženih artikla upotrijebit će se opremanja prostora za produženi boravak. Hrana koja se ne proda donirat će se javnoj kuhinji u Sokolović- Koloniji. Cilj je da se učenici, nastavnici, roditelji i stanovnici naselja kroz kreativan i dobrovoljan rad zblіže, bolje upoznaju, a i pomognu svojoj školi. Ovogodišnji slogan školskog bazara je: „Nije važno činiti velike stvari, već male stvari sa velikim srcem...“



Studenti Prirodno-matematičkog fakulteta posjetili Općinu Ilidžu

Ove kao i predhodnih godina studenti četvrte godine Prirodno-matematičkog fakulteta, Odsjek za geografiju, smjer za Regionalno i prostorno planiranje, a u okviru nastavno-naučnog procesa posjetili su Službu za prostorno uređenje Općine Ilidža. Studenti su se upoznali sa radom i aktivnostima službe na izradi planske dokumentacije, njene primjene, te provođenju zakona i drugih propisa iz oblasti prostornog uređenja i planiranja. Studenti su se u Centru za dozvole upoznali sa praktičnom primjenom GIS-a (geografski informacijski sistem) koji omogućava integriranje, spremanje, uređivanje i prikazivanje geografskih informacija.



Srednjoškolci jedan dan volontirali u Općini Ilidža

Deset učenika Srednje tehničke škole grafičkih tehnologija, dizajna i multimedije Ilidža jedan dan umjesto nastave radili su volonterski u Općini Ilidža. Ove aktivnosti se provode u okviru projekta Udruženja „Infohouse“ Sarajevo pod nazivom „VOLONTIRAJ-KREDITIRAJ“. Desetu godinu zaredom Udruženje organizuje Socijalni dan-dan kada poslodavci zapošljavaju srednjoškolce na jedan dan. Cilj projekta je jačanje kapaciteta mladih ljudi kroz povezivanje i ujedinjavanje obrazovnih institucija, profesora, privrednika, predstavnika vlasti BiH, kao i predstavnika stranih organizacija i zemalja. Time će se omogućiti mladima da preuzmu odgovornost za svoju profesionalnu budućnost, razvoj lokalne zajednice, ali i doprinijeti poboljšanju statusa mladih u cjelini. Dnevnicu za Socijalni dan iznosi 20 KM koja se uplaćuje u fond za projekte koji su učenici sami osmislili. Općina Ilidža uplatila je 200 KM na ime podrške za realizaciju ovog projekta.

Kadetkinje OK Ilidža druge na federalnom nivou

Odbojkaški klub Ilidža nakon skoro godinu pauze i izbjavanja sa odbojkaške scene u Bosni i Hercegovini obnovio je svoje djelovanje, a bivši igrači koji su stasali u pretečama sadašnjeg OK Ilidža bili su glavni inicijatori ponovnog aktiviranja kluba. I prvi rezultati su tu. Kadetkinje Odbojkaškog kluba Ilidža osvojile su drugo mjesto na Federalnom takmičenju u Livnu i plasirale se na državni nivo.

Tim povodom u Općini Ilidža, 10. maja načelnik prof. dr. Senaid Memić organizovao je prijem za njih.

Načelnik Memić čestitao je kadetkinjama na uspjehu izrazivši nadu da će medalje donositi i sa evropskog prvenstva.

“Svaki vaš uspjeh, naš je ponos. Vi ste najbolji ambasadori Ilidže, a i države BiH. Nadam se da je ovo prvi korak i da ćete donijeti i sa evropskog takmičenja medalje, a nositi zastave da se ponosno vijore” izjavio je Memić, te dodao da podrška ovom klubu će se i dalje nastaviti u skladu sa budžetskim mogućnostima.

Emir Memić, nekadašnji reprezentativac BiH i odbojkaš Famosa, Čarlija, Simposa, Kaknja i Igmana, bio je jedan od glavnih inicijatora da klub ponovo zaživi, na ovom prijemu izrazio je veliku zahvalnost na podršci načelniku prof. dr. Senaidu Memiću.

“Ovom uspjehu se nismo nadali, a nastaviti ćemo da radimo i uspjeh je neminovan. Raduje me da su ljudi poput Ifeta Mahmutovića, Harisa Zolote, Ekrema Lagumdžije i Samira Salihovića prepoznali značaj reaktivacije kluba i što će i oni aktivno učestvovati u radu našeg kolektiva, jer su oni imena koja mnogo znače u bh. odbojci ali i šire”, rekao je Memić.

Denis Muhović, pomoćnik načelnika za obrazovanje, kulturu, sport i informisanje čestitao je OK Ilidža naglasivši da samo kao jedinstven tim mogu postizati uspjehe, jer je u svakom timu svaka karika bitna.



Članice Zlatne ruke posjetile Centar za djecu oboljelu od raka

Članice Udruženja "Zlatne ruke" posjetile su Centar za djecu oboljelu od raka u FBiH. Tom prilikom uručile se poklone, slatkiše i pletene čarape, djelo njihovih ruku. Ovo je samo jedna u nizu akcija koju provode ove vrijedne članice.



Olimpijski dan u Desetoj osnovnoj školi Ilidža

U Desetoj osnovnoj školi 26. maja 2017. realizovan je projekat „Olimpijski dan Desete osnovne škole“ koji je obuhvatio cjelodnevni program sportskih i muzičko-zabavnih disciplina.

U projektu su učestvovali svi učenici od prvog do petog razreda, koji su kroz deset disciplina pokazali svoje sportsko i muzičko umijeće. Najzanimljivije je bilo u toku Igre između dvije vatre, kada su svi bili na nogama i glasno navijali i bodrili svoje vršnjake.

U organizaciji i realizaciji igara učestvovali su svi nastavnici razredne nastave. Cilj igara je realizacija časova Godišnjeg plana i programa, razvijanje sportskog i takmičarskog duha među djecom, te druženje učenika. Učenici koji su zauzeli neko od prvih tri mjesta su dobili pohvalu od strane škole.

„Moram istaći da je ova manifestacija bila od posebnog značaja za djecu, nastavnike, ali svakako i za uposlenike škole. Ovo je samo dio sadržaja, kojim obilježavamo još jedan rođendan naše škole, prije zvanične školske priredbe. Kolege i ja truditi ćemo se i da ubuduće organizujemo ovakve projekte za naše učenike i da zajedničkim snagama, idejama i doprinosom stvorimo nove sadržaje za učenike škole, kazala nam je Irma Hurić, jedan od nosilaca organizacije, inače učiteljica u Desetoj osnovnoj školi“.



Dani engleskog jezika

Udruženje za engleski jezik i kulturu "Englisch club" realizovalo je projekat Dani engleskog jezika. Na završnoj manifestaciji dodijeljeni su certifikati svim polaznicima, njih 80.

Tim povodom održana je i predstava u saradnji sa Dramskom sekcijom KUD-a Ekrem Mujkić, te predavanje o važnosti učenja engleskog jezika danas. Riječ je o udruženju koje se djelimično finansira iz Budžeta Općine Ilidža.



Dani otvorenih vrata za ilidžanske učenike

Centar za mentalno zdravlje Radna jedinica Dom zdravlja Ilidža u saradnji sa službama porodične medicine i stomatologije, laboratorijom, a u okviru Dana Kantona Sarajevo, 4. i 5. maja 2017. godine u prostorijama službe organizovali su Dane otvorenih vrata za učenike devetih razreda osnovnih škola sa područja općine Ilidža. U dva dana 130 učenika obišli su prostorije ovih službi i upoznali se njihovim načinom rada i na kraju odslušali predavanje o ovisnosti o internetu i nasilju na internetu i kako ga spriječiti.

„Cilj ovih aktivnosti je promocija i prevencija mentalnog zdravlja djece i upoznavanje učenika sa organizacijom i načinom rada službi u Domu zdravlja Ilidža“, kazala je Mirela Hadžić psiholog u Centru za mentalno zdravlje.





Školski bazar u Srednjoj tehničkoj školi grafičkih tehnologija, dizajna i multimedija

Učenici Srednje tehničke škole grafičkih tehnologija, dizajna i multimedija Ilidža, uposlenici i menadžment škole 15. maja 2017. organizirali su ispred škole Školski bazar. Učenici su izložili kreacije koje su radili sa svojim profesorima, a bilo je tu i prehrambenih proizvoda koje su spravljale vrijedne ruke ovih školaraca. Bazar je bio prodajnog karaktera. Ostvareni prihoda od prodaje izloženih artikala ići će za ekurzije ili izlete.



Bokseri Ilidže osvojili četiri zlatne medalje

Na Prvenstvu BiH u olimpijskom boksu održanom u Živinicama 21-23. aprila 2017. godine bokseri BK "Ilidža" osvojili su četiri zlatne medalje u seniorskoj konkurenciji i potvrdili da su najuspješniji klub u BiH u olimpijskom boksu.

Trener BK "Ilidža" Almedin Fetahović zadovoljan je nastupom svojih boksera i formom pred nastup na Evropskom prvenstvu za seniore, koji će se održati u Ukrajini od 14. do 24. juna 2017. godine, kao i za Svjetsko prvenstvo u Njemačkoj u septembru mjesecu.



Odbojkašice Ilidže četvrte na državnom prvenstvu

Odbojkaškom klubu Ilidža klubu povjerena je organizacija završnog turnira Državnog prvenstva za kadetkinje koji je održan 27. i 28. maja u dvorani KSC Ilidža.

Prvo mjesto osvojila je ekipa Inova iz Banja Luke, drugo Bimal Jedinstvo Brčko, treće Troglav Livno, a četvrto mjesto pripalo je ekipi organizatora, Ilidži.



Košarkaški klub Ilidža u junu na dva međunarodna turnira

Košarkaški klub Ilidža će sa svojom minibasket selekcijom učestovati na 25. jubilarnom međunarodnom turniru Matera 2017 u Italiji. Ove godine kao i svake na turniru će učestovati 60 timova iz cijeloga svijeta, Argentine, Senegala, Jordana, Palestine, Turske, Albanije, Srbije, Crne Gore, Litvanije, Italije itd.

Turnir će se održati od 18. do 24. juna 2017. za košarkaše rođene 2006/2007. godine.

Kadetska selekcija će učestovati na međunarodnom turniru „Coppa Alberto Giove“, koji će se održati od 23. do 25. juna 2017. godine u Milanu. Na turniru će učestovati 12 najreprezentativnijih evropskih timova.





Na osnovu člana 3. Pravilnika o utvrđivanju uslova, kriterija i postupka za izbor najljepšeg dvorišta i balkona sa cvijetnim aranžmanom, Broj:16-22-1977/15 od 06.05.2015.godine, a u cilju očuvanja tradicije ilidžanskih cvijetnih bašči i parkova, podizanja svijesti građana o značaju uređenja i brige o sopstvenom dvorištu, ulici, mjestu i njegovoj čistoći, očuvanju životne sredini, a što će doprinijeti i boljoj turističkoj ponudi, Općinski načelnik objavljuje:

JAVNI POZIV ZA IZBOR NAJLJEPŠEG DVORIŠTA I BALKONA SA CVIJETNIM ARANŽMANOM NA PODRUČJU OPĆINE ILIDŽA

I

Pozivamo sve zainteresovane građane da prijave svoja dvorišta i balkone na takmičenje za izbor najljepšeg dvorišta i balkona sa cvijetnim aranžmanom na općini Ilidža.

Prijaviti se mogu svi zainteresovani građani koji imaju prebivalište na području općine Ilidža.

II

Odluku o izboru najljepšeg dvorišta i balkona donosi Općinski načelnik na prijedlog Komisije koju će imenovati u tu svrhu, a koja će običi prijavljena dvorišta i balkone, sačiniti foto-dokumentaciju i ocjeniti ih prema sljedećim kriterijima:

- * Održavanje i urednost dvorišta – balkona;
- * Prostorni odnosi sadržaja u dvorištu – na balkonu;
- * Uloženi trud, izbor i njegovanje biljaka, poštivanje tradicije i elemenata našeg podneblja;
- * Ukupni estetski dojam.

III

Za najljepše dvorište i balkon dodjelit će se po tri nagrade: prva, druga i treća u sljedećim iznosima:

	za dvorište:		za balkon:
I nagrada	500 KM	I nagrada	300 KM
II nagrada	400 KM	II nagrada	200 KM
III nagrada	300 KM	III nagrada	100 KM

IV

Svoje prijave možete poslati putem prijavnog obrasca kojeg možete preuzeti sa web stranice Općine: www.opcinailidza.ba, u prostorijama MZ i info desku (šalter sala) Općine Ilidža.

Prijava treba da sadrži:

1. Ime i prezime;
2. Tačnu adresu, kontakt telefon ili e-mail adresu;
3. Za koju kategoriju natjecanja se prijavljuje (dvorište, balkon).

Zahtjevi se predaju putem pošte, na protokolu Općine Ilidža, ulica Butmirska cesta broj 12, sa naznakom za javni poziv za izbor najljepšeg dvorišta i balkona ili putem e-mail adrese ilidzaturizam@gmail.com

Javni poziv ostaje otvoren do 23.06.2017. godine.

Sve dodatne informacije mogu se dobiti u Službi za privredu i turizam Općine Ilidža, soba 325, kontakt osobe Sitnić Indira i Prašović Adel, telefoni 033 775 755, 775 754.

Želja nam je da bar na trenutak istaknemo u prvi plan ljude koji su odlični primjeri kako neko ličnim angažovanjem može doprinijeti da se njihov najbliži, komšije i slučajni prolaznici osjećaju prijatnije, a samim tim budu i mnogo raspoloženiji te da podjele ljepotu sa drugima.

ZAHVALJUJEMO NA VAŠIM PRIJAVAMA I UČESTVOVANJU U OVOJ AKCIJI JER TIME DOPRINOSITE LJEPOTI I UGODNOJ ŽIVOTNOJ SREDINI, VJERUJUĆI DA ĆE UČESNICI SA OVOG TAKMIČENJA PORED NAGRADA PONIJETI I POZITIVNE EMOCIJE I ENERGIJU.

OPĆINSKI NAČELNIK
Prof.dr. Senaid Memić

Butmirska cesta br. 12. Sarajevo, BiH, tel/fax. +387 33 622-483, centrala 775-600,
www.opcinailidza.ba, E-mail: privreda.turizam@opcinailidza.ba